

Date – 22/10/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Home Minister Pu K.Sapdanga'n naktuk atanga Mizoram chak phurh luhna ber, Vairengte leh Aizawl inkar kawngpui dan tum chu sorkarin tha a ti lo a ti.
2. Thla thar November ni 11-a Dampa bial By Election neih tur a candidate panga te pawm vek a ni.
3. Dampa bial by election lo awm tura BJP party tana campaign tu Union Minister Kiren Rijju an Dampa leh Delhi thlunzawm a nih theih nan Dampa bialchhung mipui ten mawhphurhna lian tak an nei a ti.
4. Rashtriya Janata Dal (RJD) hruaitu Tejashi Yadav chuan Bihar-ah Grand Alliance an sawrkar anih chuan thingtlang hmeichhia Jeevika Didi te tan sawrkar hna nghet pek vek an tiam.

<><><>

GOVT WARN AGAINST NH BLOCKADE

Home Minister Pu K.Spadanga'n naktuk atanga Mizoram chak phurh luhna ber, Vairengte leh Aizawl inkar kawngpui dan tum a ni chu Mizoram sorkarin tha a tih loh thu a sawi a, Mipuite tana harsatna siam thei zawnga hmalak anih chuan sorkarin a tul ang zelin hma a la ang a ti.

Vawiina MINECO Conference Hall-a a hova sorkar aiawhte nen thuthar thehdarh tute an kawmnaah Home Minister chuan he thu hi sawiin, Mizoram Tripper Association Driver & Owner Kolasib district ten naktuk ni 23 zing dar 7:00 atanga kar thar ni 26, Pathianni tlai dar 4:00 thleng Vairengte atanga Aizawl inkar kawngpui dan an tum chu Mizoram sorkar chuan tha a ti lo a, a ngai thutak hle a ti a, tun dinhmuna kawngpui thawm that kawnga theihtawp chhuah a nih thute bakah, ni li chhung zet kawngpui dan a nih chuan harsatna nasa zawk a thlen palh a hlauhawm thu Home Minister hian a sawi a ni.

Pu K. Sapdanga chuan kawngpui dan luih tum tute chu dan hmanga hrem theih an nih thu sawiin dan kengkawhtu Police te pawh inralrin tir an nih thu a sawi bawk.

Byte of Pu.K. Sapdanga.....

He huna thusawitu dang, PWD changtu Minister Pu Vanlalhlana chuan ruah tui a hul tan avangin November thla chhung ngei a kawngpui thawmthat hman a beisei thu a sawi a ni.

He huna tarlan anih dan chuan tunhnaiah ruahtui a tlem chhoh tan avangin lirthei tangkhang a tlem chho zel a, tukin dar 8.30 thleng khan lirthei tangkhang a awm lova, Aizawl lam panin lirthei load phur 367 chhuah niin, Kolasib lam pan tur lirthei 618 chhuah a ni bawk a, darkar 24 kalta chhungin lirthei 985 helai kawngah hian an tlan tlang a ni.

Hetihlai hian, Food Civil Supplies & Consumer Affairs Minister Pu B. Lalhhanzova chuan Mizoram sorkarin thla hnih chuang daih buhfai quintal nuai khat sing nga chuang a kawl mek thu sawiin eirawngbawlna gas lakluh kawngah pawh theih tawp an chhuah mek a ti a.



YMA CONFERENCE

Young Mizo Association YMA rorelna sang ber, YMA Inkhawmpui Lian vawi 75-na chuan Mizoram chhunga inkalpawhna kawngpui hrang hrang a chhiat avanga mipuiten harsatna an tawk nasa lutuk thin a ziaawm theihnan Mizoram Sawrkarin tun aia chak zawkin hma la rawh se an ti.

YMA Rorel inkhawm hi Sakawrdai Chengkawlaw Runa ah Central YMA President Pu Lalmachhuana kaihhruaiin neih a ni a, Sawrkar hmalakna tur nawr ngai ni a an ngaih te relin, chung zingah chuan Inner Line Permit (ILP) hi tun aia khauh leh awmze nei zawka kalpui a nih theih nan YMA-in Sawrkar-ah thlen rawh se tih leh Tui hnar humhalh dan siam ni rawh se tih te a tel a ni.

Kan corr report lo ngaithla ang.

YMA Inkhawmpui Lian vawi 75-na rorel inkhawmah hian Central YMA Budget 2025-2026 atan cheng vbc 2 nuai 11 sing 4 & 9,935 an pawm a, Kum 2027 a YMA Inkhawmpui Lian chu Vairengte Joint YMA thlen turin Vairengte-ah nghah a ni.

Rorelnaah hian Palai mi 1506 an kal a, kum 2025-2027 Kumpuan atan “Ruihhlo Do” thlan a ni bawk.

Hei bakah hian YMA Khawih an thurel zingah ah chuan - YMA inkaihhruaina leh nihphung leh hruiute mawhphurhna rampumah inzirtira neih ni rawh se tih te, Mizoram chhunga hnamdang sumdawng, phalna nei lo tam ta lutuk hi titlem turin YMA-in hma la rawh se tih te a tel a, Mizo hmeichhia ten hnamdang pasala an neih zel loh nan Central YMA hian inzirtirna nasa zawkin kalpui rawh se tih te, Mizo Infiamna te chawisan a nih theih nan CYMA in hma la se, Zohnahthlak chi peng hrang hrang Mizoram a chengte zingah chi bil hmalakna a awm tawh loh nan Central YMA in hma la rawh se tih te a tel bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



DAMPA BY ELECTION SCRUTINY

Thla thar November ni 11-a Dampa bial By Election neih tur a hming pe lutte enfiahna chu candidate panga ten an paltlang vek.

Vawiin khan Dampa bial Returning Officer Pu Malsawmzuala hovin Mamitah candidate te hming endik a ni a, Pu Malsawmzuala chuan Dampa bial by election chuh tura nomination paper an dawn zawng zawng ten scrutiny an paltlang a, ni 24 tlai dar 3 thleng candidate te tan inhnudawhna hun hawn anih nghal thu a sawi a ni.

Byte : Returning Officer Pu Malsawmzuala

Dampa bial by-election ah candidate 5 an awm dawn a, BJP chuan Candidate atan Pu Lalhmingthanga thehchhuakin, Congress in candidate atan Pu John Rotluangliana an ruat a, MNF in an candidate atan Dr R Lalthangliana chhawp chhuakin ZPM chuan candidate atan Pu Vanlalsailova an ruat a, PC party chuan candidate atan Pu K. Zahmingthanga an ruat thung a ni.

Dampa Bialah hian vote thlakna hmun (polling station) 1,276 a awm a, Dampa Bial chhungmi vote nei mipa 10,605 leh hmeichhia 10,185 bakah, sorkar hnathawk (service voter) mipa 111 leh hmeichhia 4 an awm a; vote nei zawng zawng hi an vaiin mi 20,905 niin, mipa 10,716 leh hmeichhia 10,189 an ni.



DAMPA – CAMPAIGN

Dampa bial by election lo awm tur atana BJP party in West Phaileng a campaign an hawinna inkhawm vawiina neihah Union Minister, Parliamentary Affairs leh Minority Affairs changtu Kiren Rijiju chuan thusawiin Dampa leh Delhi thlunzawm tlat a nih theihna turin Dampa bialchhung mipui ten mawhphurhna lian tak an nei a ti.

Pu Rijiju a chuan Dampa bialah mi hrang daih ang a a kal loh thu leh, an unaupa ang mai a, a kal thu a sawi a, BJP candidate Pu Lalhmingthanga thlan tlin a nih chuan Siaha-a Development project thahnem tak a luang lut ang chiahin Dampa bialah pawh a luan luh ve tur thu a sawi bawk.

Mizoram state BJP President Dr. K. Beichhua pawhin thu sawiin, tun bye election-a an manifesto te chu central hriatpui a nih avangin Dampa bial BJP candidate thlan tlin a nih phawt chuan Siaha leh Delhi thlunzawm a nih ang bawkin Delhi leh Dampa pawh thlunzawm nghal a nih tur thu a sawi bawk.

Dampa bial BJP candidate Pu Lalhmingthanga pawhin thusawiin, Dampa Bial tan theihtawp chhuaha a lo vahvaih ve tawh thute leh, Bial hmasawinna tura nasa taka hma a lo lak ve tawh thin thute a sawi a. ZPM candidate tlin leh thlin loh chuan Sorkarna ah engmah danglamna a thlen tawh dawn loh thu leh Dampa Bial

tan hmasawnna tak tak a thlen theihna tur atan Dampa mipui zawng zawngte’n amah vote vek tura a ngen thu a sawi bawk.

MNF Party pawhin mipui vote zawngin ngawrh takin an thawk chhuak a, an party candidate Dr.R.Lalthangliana chuan Bawngthah, Darlung, S.Sabual, Bawlte leh Kangmun te a tlawh a. Lu sun mek party an ni tih sawiin, Pu Rintluanga hmachhawpte chhunzawm a nih theihna tur te, a theihna zawng zawngin Dampa bial tan hmalak a tum thute leh Dampa bial atanga bul tana Mizoram tan tih takzeta inpumpek a tum thu a sawi a. He mi tihlawhtling thei turin party thliar lovin Dampa bial mipui zawng zawng khawngaih vote a dil a ni.

(Corr : John)
BIHAR

Bihar Assembly inthlan campaign ngawrh taka neih chho mek a ni a.Rashtriya Janata Dal (RJD) Tejashi Yadav chuan Bihar-ah Grand Alliance an sawrkar anih chuan thingtlang hmeichhia Jeevika Didi te tan sawrkar hna ngeth pek vek an tiam. Hetihlai hian BJP chuan he an intiamna hi tihlawhtlin theih loh tur intiamna mai anih thu an sawi. BJP hruaitu Nityanand Rai chuan Pu Yadava thusawi hi chhangin an intiamna chu a tak awm lo anih thu a sawi a. Mite ngaihdan ti phirtu mai anih thu sawiin Prime minister Narendra Modia leh Chief minister Nitish Kumar te chuan Jeevika Didis te nunah hlimna tam tak an thlen a ni a ti.

<><><>